

Yargel Sul

1

Zzasoso Dae Biex

¹ Ngo mel Arbosobo nei Seirpor Yisu Zidu leil visser su Yargel ddei nga a. Ngo middurbbor cirmaex-hanga hher dae Yoxrtaexl su ca ceinir cuxr leil zzasoso dae biex.

Arbosobo Leil Ddarzzi Doxr

² Arzzi-nimar arzzi-nimo mel, nia cirza-hanga goxr sol bbeixarnar, nia halae yarzi ggese nia. ³ Nia saexl eine nga a mel, azo lerler nr seir pex dae a lei, nia Arbosobo leil ddarzzi doxr dae a mel dder ho bei ho ssersei xie. ⁴ Nia sser gex doxr dae a, seirceix-seirmaer loxr a, nixmox zzar nr seir lei ardoxr nr zza, seir gaxzi a. ⁵ Nael nia arseir olnol-nr-ddu a mel dder Arbosobo leil qiuxr nia; yar nia leil yarzisael olnolddu lol ggese, nia leil bota nr var, yel yar nia leil gger var. ⁶ Nael nia Arbosobo dax qiuxr a mel dder yar leil ddarzzi nia, ddar-nr-zzi cirdoxr lei zza nr ddo. Yar leil ddarzzi gax-nr-zi su ca hal mel mel eil yox lei xiar, hal yox lei xiar hherdder mersi jia a neixvi gga bolaxl ddaexr mel sael a nga. ⁷⁻⁸ Ca eil mel mel bar zzae bar-nr-ver, azo bei nia lei xiar nr har, yaa Seirpor dax azo lerler li wo ddo xiar nr ssa.

Casolssor Nei Cabessor

⁹ Yisu leil ddarzzi su casolssor mel Arbosobo yaa leil middux lol, yel yaa ggese nia; ¹⁰ cabetesu mel leil yaa sael a mi-nr-ddux lol, yel yaa lei ggese nia. Cabetesu mel vixlux yixr sael a veixsixl nia. ¹¹ Merni ddux lei a, arleixr lel a, vixlux yixr mel dder hie zzu a, veixsixl a, igax nr zae a. Cabetesu mel miar ho bei ho dder vixlux eil mel sael a loxr var.

Nr Seir Pex Dae A Lei Sserssei Xie

¹² Arbosobo mel yar leil perniar su ca mel dax bbeix har zaxr goxr a, yaa goxrsol-goxrnaxr sixr i dae mel pex dae a, sserssei xie arddeirnga a, yar yaa lei seir lol a, cirse-cirsil yar dax goxr dae lol nia. ¹³ Arbosobo mel, nr seir mel yar leil sixr i lol nr var. Yar lei nr seir mel ca leil sixr i ssi nr var. Yel arseir nr seir mel bei ssi niazzir dae a mel, “Arbosobo ngo leil sixr i a bei ssi lol a,” bbeix nr ddo. ¹⁴ Ca cirddeir-hanga lei nr seir bei ssi niazzir a mel, yar armael nixmox zzar nr seir xiar dae mel sael a bei ssi a nga arddeir a. ¹⁵ Yar nixmox zzar nr seir xiar ji dae a dder zuixl bei a. Zuixl bei doxr huixr-nr-soxr a mel, yar ddei xiu ddei dder si a cirse-cirsil Arbosobo dax bbe kae.

¹⁶ Ngo perniar dae arzzi-nimar arzzi-nimo mel, nia si nia leil fur wo lol nr ddo! ¹⁷ Seirseir maelmaerjjia nei seirceix-seirmaer cirza-hanga mel, Arbosobo dax lei arddeir a. Yar mel merlabbor cirza-hanga bbo dae mel bei teixl lei su ddei nga a. Avix mel hacixl-hage ha var, nael Arbosobo mel eine nr nga; yar gierbox nixixl nr zza. ¹⁸ Yar armael xiar dae mel sael a bei a, niul yar ddei ddarzi mel leil koxl dae a, cirse-cirsil lei yar dax cirgo a hher cexr. Yar halae niul leil yar bei teixl lei cirza-hanga mel gga yar ddei seirceix-seirmaer cassor-worssor loxr lol.

Noni Ho A Bei Ssi

¹⁹ Ngo perniar dae arzzi-nimar arzzi-nimo mel, nia holcir dae nia: si ddar biar dae a mel, nia cirddeir-hanga lei zabbar noni dae nia; nia ddar bbeix a mel, xiar har ho a saelnei bbeix ddo; ha bbeix nr bbeix dder sirzzi nr ddo. ²⁰ Ca mel sirzzi a mel, Arbosobo xiar dae seirseir mel nr bei ssi. ²¹ Yel buxlguaxr-laxlsixr nei yarzi gexrddo hal mel nia zeixleixr bei nr ddo, cirdoxr lei nr col, nia nixmox zzar ji dae Arbosobo ddei ddar mel leil zabbar seirseir a ddarzzi dae nia. Eine nga a mel, nia leil dder jiuwl wo a.

²² Nael nia Arbosobo ddei ddar mel noni ho a nr bei ssi a mel, armael leil fur dae lalnga a; yel nia yar bbeix dae mel sael a bei ssi nia.

²³ Arbosobo ddei ddar mel noni ho a nr bei ssi su ca mel dder ca ar ddei a jixlzi gga armael qiaxrmeix ddei leil i, ²⁴ i ho a, ssi du si a, cirleixr dder armael arsae ar ddei a hol-nr-cir sael a nga. ²⁵ Nael Arbosobo ddei Lixlfaxr mel nr hoxr lei ardoxr nr zza. Arseir Lixlfaxr ddei dax bei mae dae a mel, zuixl ddei yar leil guaxr nr gex dae a. Yar Lixlfaxr ddei zabbar seirseir a zza a, bei mae doxr dae a mel, noni ho a dder hol-nr-cir ca hal mel sael a nr nga. Eine nga a Arbosobo dder yar leil seir lol var.

²⁶ Ha arseir yar Arbosobo dax bei mae dae eine zzir dae a, nael armael meir qier leil zzael guaxr ssei nr xie, eine nga a mel dder armael leil fur dae lalnga a; halae yar Arbosobo leil baexr a ddarzzi a. ²⁷ Nael niul ddei Arbbor Arbosobo meixddurga gga yar dax bei mae dae botaddu nr zza ca hal mel mel, hherdder goxr sol dae arbbor ama nr zza anix leil nei maermocir mel leil guaxr, halae nixmox zzar seibeixbeixmo, nr seir bei su mel sael a nr bei ssi su ca hal mel nga a.

2

Ca I Nr Ddo

¹ Ngo ddei arzzi-nimar arzzi-nimo mel, niul ddei Seirpor Yisu Zidu yarzi middux. Nia yar leil ddarzzi a mel, ca i nr ddo. ² Bir dae a bbeix, sae leixrdox ddexr dae, pia yarzi naxrcixl veixr dae ca ar ddei a nia ddei Arbosobo ddei sulzzaggie ddir lei a; yoxl pia yarzi ggiexrtaex veixr dae casolssor ar ddei a lei ddir lei a; ³ nia dder pia naxrcixl veixr dae hal ddei leil i du a, yar leil nael bbeix: “Ni cux seir ggie eilmaex cux lei.”

Casolssor hal ddei leil nael bbeix: “Ni halmaex ngier dae bbeixsael ngo baxrde qihher ddei dax cux dae,” eine bbeix a. ⁴ Nia eine bei arddeirnga a mel dder casersu nixmox bbae-nr-hhex mel sael a nga a zzarmar?

Hherdder nixmox nr seir, ca i a!

⁵ Ngo perniar dae arzzi-nimar arzzi-nimo mel, nia noni dae nia!
Arbosobo zzael mer woxrke casolssor mel leil tiur a, yar leil yarzisael
ddarzzi lol, yar ddei goxr ddei li wo lol. Yar ddei goxr eil ddei mel
hherdder yar, yar leil perniar su mel leil gger nia bbeix har zaxr goxr hal
ddei nga a. ⁶ Nia zzael halae casolssor mel leil ci, yaa leil bei vuxryixr!
Nael nia leil ci su, nia leil ca leil ser su vaervaerpor dax gga mal gger su
mel doxl, hherdder cabetesu mel nga a zzarmar? ⁷ Nia ddarzzi dae, nia
visser dae Seirpor Yisu ddei leil bbeix vuxryixr su mel lei hherdder
cabetesu mel nga a zzarmar?

⁸ Arbosobo Ddei Sul ber gga Lixlfaxr leil bbeix: “Nia si leil perniar a mel,
armael leil perniar sael a perniar nia,” eine bbeix a. Nia niul ddei
zzirmar Arbosobo ddei Lixlfaxr eil ddei dax bei mae dae arddeirnga a
dder hoxr a. ⁹ Nael nia ca i arddeirnga a mel dder zuixl bei a; Lixlfaxr
ddei dax bbeix ci a mel, nia dder Lixlfaxr dax bei nr mae su ca mel nga a.
¹⁰ Ha arseir Lixlfaxr mel gga ar yoxr dax bei nr mae dae a mel dder
maelmaerjia dax bei nr mae dae sael a nga a. ¹¹ Bir dae a bbeix, Lixlfaxr
mel bbeix: “Ni kebal ca mel dax kerjiar nr ddo, ca seixl nr ddo.” Nael ni
ca dax ker-nr-jiar bbeixarnar, ca seixl a mel dder Lixlfaxr mel dax bei nr
mae dae a. ¹² Arbosobo mel Lixlfaxr mel dax zox dae a ca mel leil ser nia;
yel nia azo bbeix azo bei lei Lixlfaxr dax bei mae dae nia. Ca mel Lixlfaxr
ddei dax bei mae dae a mel, zuixl ddei yaa leil guaxr nr gex dae a. ¹³ Si
leil zoxl-nr-nixr su ca mel, Arbosobo yaa leil ser car a, yaa leil zoxlnixr
nr var; ca leil zoxlnixr ssi a mel, bir ca leil ser ssi leil seir leixl.

Ddarzzi Nei Bei Ssi

¹⁴ Ngo ddei arzzi-nimar arzzi-nimo mel, arseir bbeix yar Arbosobo leil
ddarzzi eine bbeix arddeirnga a, nael yar Arbosobo bbeix dae mel zzael
nr bei; eine nga a mel, yar Arbosobo leil ddarzzi a guaxrzoxr a ngo? Yar

Arbosobo leil eine ddarzzi a, yar leil jiuxl wo ddo a ngo? ¹⁵ Bir dae a bbeix, nia jiaxlhuixl gga arzzi-nimar bbeixsael arzzi-nimo mel zzorddu nr zza, veixrddu lei nr zza, ¹⁶ nia halae yaa leil bbeix: “Nia ssi ddo a. Nia leil zzaso lol nia, nia leil zzorbboxddu zza lol nia, lomelmel arla veixrddu zza lol nia,” eine bbeix a. Nael yaa leil yaa ggecir ddei sser zoxr mel zzael nr gger! Eine bbeix a mel, yaa leil guaxrzoxr a ngo? ¹⁷ Ciryoxr a nga, nia nixmox zzar ddarzzi dae arnar, nr bei ssi a mel dder baexr a ddarzzi dae sael a nga.

¹⁸ Nael ca ar ddei a bbeix: “Ca eil ddei mel, ddarzzi; ca hal ddei nael, bei ssi,” eine bbeix var. Ngo dder yar leil bbeix: “Ni azo lei nr bei ssi a mel, ni arsaе ddarzzi ngo leil i lol la lar. Ngo doxl, ni leil ngo bei dae mel i lol a dder ngo ddarzzi ni saexl var,” eine bbeix nia.^a ¹⁹ Ni Arbosobo cir ddei lar zza ddarzzi a mel, yarzi seir! Neir mel lei eine ddarzzi, yaa halae Arbosobo leil yarzisael gexr. ²⁰ Nael ni ddarzzi dae arnar, nr bei ssi a mel, ddarzzi dae lei azo guaxr-nr-zoxr zzarmar? Ca medeil eil ddei ni, ni nr saexl a ngo? ²¹ Niul ddei porpor Yalboxrlahar mel Arbosobo leil zi ggie yar ssor Yirsar leil seixl a, Arbosobo leil zi yuex. Yel Arbosobo yar leil zuixl nr zza i mal gger. ²² Nia i ddo a. Yalboxrlahar mel nixmox zzar lar ddarzzi nr nga a nei, halae Arbosobo bbeix dae mel sael a bei ssi a. Yel yar eine bei a mel dder Arbosobo leil ddarzzi gaxzi a. ²³ Eil ddei mel hherdder Arbosobo Ddei Sul ber leil vaexr dae mel sael a nga, bbeix: “Yalboxrlahar Arbosobo leil ddarzzi a, Arbosobo yar leil zuixl nr zza i mal gger a,” eine bbeix a. Yar leil halae Arbosobo ddei ggocar a bbeix. ²⁴ Yel Arbosobo yar leil zuixl nr zza i mal gger a mel, yar ddarzzi dae lar nr nga a nei, bei lei bei nia.

²⁵ Ggecir vurlelsu Lahexr mi ssormaer hal ddei mel Yoxrtaexl su meixr

^a**2:18** Ca cirmelmel a zzir dae a ddarzzi dae a dder ddo a; seirseir hal mel bei ssi nr ssa.

hal nnel leil hexl a, yaa leil beijjiu a, kebal jjiumo mul gger a, pa teixl lol. Yar eine bei a, Arbosobo yar leil zuixl nr zza i mal gger a. ²⁶ Yel ddarzzi dae arnar nr bei ssi a mel, yarzi ddarzzi nr nga; hherdder ggecir ddei xiu nr zza a, si ho sael a nga.

3

Armael Ddei Meir Ddei Leil Guaxr

¹ Ngo ddei arzzi-nimar arzzi-nimo mel, nia saexl, Arbosobo Ddei Sul ber ca leil mulggersu mel bei cox arddeirnga a, yaa leil bir kebal ca mel leil ser larhor var. Yel nia Arbosobo Ddei Sul ber ca leil mulggersu mel bei meixr nr ssa. ² Niul mel cirke bei cox. Nael arseir armael leil ddar lei bbeix cox lol nr goxr arddeirnga a, yar mel dder seirceix-seirmaer ddei nga a; yar armael ddei cingge-circir lei guaxr ssei xie a. ³ Bir dae a bbeix, niul mur bbordu ddei mur meir ddei leil toxl gex gger arddeirnga a mel, yar leil niul ddar no lol cexr, niul yar leil arddol ssi lol niazzir mel dder arddol ssi lol cexr a. ⁴ Halae cuaxr ar jiaxl a yarzi vaer, yoxl mersi daxlgaxl jia bbeixarnar, nael cuaxr jiaxl leil boxrlabox yelye arla hal ddei lei boxr dae a mel dder arddol ssi niazzir dder arddol ssi cexr. ⁵ Ciryoxr a nga, niul lo ddei yelye a nga bbeixarnar, nael yarzisael kuarddo.

Nia arleixr xiar, adoxlgie yelye cirdoxr a nga lei, sixzzei cili vaervaer ar ggu cu du lei lol var. ⁶ Lo ddei mel niul ggecir leil gexrddo zzir ddei nga a. Yar niul olga cirddeir-lorbba leil nr seir loxr lol var. Yar hherdder dixlyuxl gga nol si lei adoxl mel sael a nga. Niul ca mel ddei olga cirddeir-lorbba cu pixl gger var, armael ddei armael leil ke var. ⁷ Ca mel bbiu dae ngaxssor-ngaxne, halae middurbbor maex dae mel leil nei ajjix gga hher dae cirza-hanga yirvu-nilhax eil mel leil lei guaxr ze i xie. ⁸ Nael arseir lei lo ddei leil guaxr ze i nr xie; lo ddei mel yarzisael gexrddo, doxl zil lei naxcir niar dae sael a nga. ⁹ Niul lo ddei sser a, niul ddei Seirpor

Merhhexr Arbbor leil bbeix zae gger; nael niul yoxl Arbosobo armael dax zox dae a bei teixl lei ca mel leil hie no. ¹⁰ Ngo ddei arzzi-nimar arzzi-nimo, bbeix zae gger nei ca leil hie no a lei meir cir ddei gga a bbeix teixl lei, nia eine bei nr ddo! ¹¹ Lur cir su gga mel, ajjix seixzzi nei ajjix naex pe teixl lei var a ngo? ¹² Ngo ddei arzzi-nimar arzzi-nimo, vuxrhuagol zzei leil mel saercor niar teixl lei var a ngo? Puxрто zzei leil mel vuxrhuagol niar teixl lei var a ngo? Ajjix naex pe teixl lei dae lur ar su gga mel ajjix seixzzi pe teixl lei nr var.

Arbosobo Ca Leil Arsae Bei A Saelnei Hoxr Saexl Lol

¹³ Nia ca mel gga yarzi olnołddu su ca zza zza? Zza arddeirnga a, yar dder nixixl goxr a col nr ddo, seirseir mel bei, eine nga a mel kebal ca mel yar olnołdduddumo bei dae mel lei mia a dder yar arsae ar ddei a saexl var. ¹⁴ Nael nia nixmox zzar ca leil yarzi nixnox, armael leil lar guaxr, eine nga a mel, nia dder kuar nr ddo, ngazi hal mel nga-nr-zi eine bbeix nr ddo. ¹⁵ Nia bei dae olnołddu eil mel Arbosobo xiar dae ddei dax zox dae nr nga a nei, ca mel xiar dae ddei dax zox dae; Arbosobo ddei Xiu ddei dax zox dae nr nga a nei, neir zzirmar Sardaxl te dax zox dae. ¹⁶ Ha arddolmaex gga ca mel armael leil lar xiar gger a, si leil nixnox a mel, arddolmaex dder yarzi luaxl var, yarzi gexrddo bei var. ¹⁷ Nael Arbosobo ca leil olnołddu lol a mel dder: nixmox seibeix var, zzicarzzi dax zex ddu lei nr zza, si leil xiar gger var, zzicarzzi dax ddar no, ca leil zoxlnixr, ca nr i, yarjiar nr bei. Eine nga a mel dder saer zzei mel saer naxrcixl niar teixl lei sael a nga. ¹⁸ Ca mel zzi dax tołtor a bei a, seirseirmo nga var. Hherdder silmo naxrcixlcixl dae ji a, lołmoxr zzei naxrcixlcixl ner teixl lei var mel sael a nga.

Middurbbor Cirza-hanga Mel Leil Lizoxr Nr Ddo

¹ Nia zzicarzzi dax zzideil zzieh a mel arsaenga a nga arddeir a neil? Nael hherdder nia nixmox zzar armael leil lar xiar gger a nga arddeir a zzarmar? ² Nia cirza-hanga lei li niazzir. Li nr wo a dder, si leil seixl; si leil nixnox a, si leil hie, si leil deil. Nia, nia li niazzir mel li nr wo a mel, nia Arbosobo dax nr qiuxr a nga arddeir a. ³ Nael nia qiuxr car, nr seir ar mel xiar dae lalnga, armael gaxggor seir lotuxr a, Arbosobo leil qiuxr. Eine nga a mel yar dder nia leil gger nr var.

⁴ Nia middurbbor cirza-hanga mel leil lizoxr a mel, nia dder Arbosobo leil per-nr-niar. Hherdder capor ar ddei a kebal ssormaer dax kerjia a, yar maerssor leil per-nr-niar mel sael a nga. Eine bei a mel Arbosobo leil dir, nia nr saexl a ngo? Arseir middurbbor ddei cirza-hanga li a mel, yar dder Arbosobo leil vuxryixr su ca ddei nga a. ⁵ Arbosobo Ddei Sul ber bbeix, niul Arbosobo leil per-nr-niar, kebal leil perniar a mel, niul nixmox zzar hher dae Arbosobo ddei Xiu ddei nix-nr-nox arddollei? Nia zzir dae a ddar eil mel nrbba bbeix lalnga a ngo? ⁶ Nael Arbosobo halae niul leil yarzi zoxlnixr, yarzi perniar. Arbosobo Ddei Sul ber leil bbeix: “Arbosobo mel col su ca mel leil nael dir, nr col su mel leil nael yarzi zoxlnixr, yarzi perniar.”

⁷ Yel nia Arbosobo ddei ddar no nia. Neir zzirmar Sardaxl leil dir nia. Yar leil dir a mel, yar dder pa du si var. ⁸ Nia Arbosobo dax naer ssi a mel, Arbosobo dder nia dax naer lei a. Zuixl zza ca mel, nia leixrhher zze leil seibeix lol nia, nr seir mel bei ssi lol nr ddo! Nia eil yox lei xiar hal yox lei xiar su ca mel lei nixmox ddei seibeix lol nia. ⁹ Yel nia nia ddei zuixl mel leil weix a, zzasol nia, cix nia, nge nia; vaeddu mel ngeddu loxr lol nia, ggeseddu mel cixddu loxr lol nia! ¹⁰ Nia Arbosobo meixsaer qier leil nr col a mel, yar dder nia leil i du var.

Ca Leil Bota Nr Ddo

¹¹ Ngo ddei arzzi-nimar arzzi-nimo mel, nia zzicarzzi leil bbeix vuxryixr nr ddo, bota nr ddo. Ca leil bota a mel, hherdder Lixlfaxr ddei leil bota sael a nga. Eine nga a mel nia Lixlfaxr ddei dax bei mae su ca nr nga, Lixlfaxr leil ser su sael a nga. ¹² Lixlfaxr dil gger su nei ca leil ser su mel cir ddei a zza, hherdder Arbosobo nga a. Yar larnei ca leil jiuxl cexr; yar larnei ca leil dixlyuxl gga ssi lol cexr. Ni azo suax bbeixleir? Ni si leil eine ser bel.

Armael Leil Kuar Gger Nr Ddo

¹³ Ngo nia leil bbeix gger, nia ddar bbeix a bbeix: “Eilni bbeixsael arggeni niul zzi ar ddei gga ssi nia, halmaex gga ar koxl hher nia, vaexleixr bei a, zzirbae zex nia,” eine bbeix. ¹⁴ Nael arggeni gol gol nr gol lei nia nr saexl seir! Nia ddei olga ddei azo suax bbeixleir? Hherdder meixker sael a nga, arleixr ddux lei ho a qie dder mier a. ¹⁵ Nia mel bbeix: “Seirpor Arbosobo ddarkoxl arddeirnga a, ngua dder gol dae cexr, eil yox bei ssi cexr, hal yox lei bei ssi cexr,” eine bbeix nia. ¹⁶ Nael nia mel yarzi col yarzi kuarddo arddolcar a arsae nga var eine bbeix. Nia eine bbeix a mel, yarzi gexrddo arddeir a.

¹⁷ Yel arseir azo lerler seirseir mel bei ssi nia saexl a lei, nr bei ssi a mel dder zuixl zza.

5

Cabesu Mel Leil Bbeix Gger Zaxr

¹ Nia cabesu mel noni dae nia! Arddolcar a, nia mel goxr sol nia, yel nia worcixl-worni nge zaxr dae nia. ² Nia ddei zzaegu perniarniar mel lei xiaxr ho a; pia mel lei bber zzor ho a. ³ Nia ddei piu sae mel lei maelvi zzor ho a; maelvi zzor dae ddei leil mia a dder nia bei dae mel nr seir saexl ddo. Yel Arbosobo nia ggecir ddei leil adoxl cu sael a bei xiaxr gger

nia. Nixixl maelele gga goxr ci a lei, nia halae cirza-hanga mel armael leil lar zaxr gger, si leil bbe nr gger! ⁴ Nia, nia leil mi paxr gger su mel leil worper lei nr gger a, yaa lei nia leil goxl dae a! Loxlmoxr se gger su mel nia leil goxl dae ddar hal mel lei yarzi ddo Seirpor Arbosobo bbejjiur ho a. ⁵ Nia nixixl goxr a laxlcir-laxlzoxlmo bei, yarzi bbae seir, armael leil xiu paxl gger, nael ca leil ser nixixl ddei ci a mel, nia leil dder ake zeil paxl dae veixr mel sael a, seixl du a. ⁶ Ca seir mel nia leil dir lei nr dir, zuixl lei nr zza, nael nia halae yaa leil zuixl dixl gger, yaa leil bei zil gger.

Sserssei Xie Nei Arbosobo Dax Ddar Biar

⁷ Arzzi-nimar arzzi-nimo mel, nia ssertexr zza nia. Nia arleixr i: mipaxrsu mel lei mi gga yarzi naxrcixl loxlmoxr se wo niazzir a, almer lei zzezze xia ci xie, yarzi ssertexr zza. Ciryoxr a nga, nia lei Seirpor jjixr lei zzezze, sser ci nia. ⁸ Seirpor jjixr lei nixixl ddei mel ci jiur a. Yel nia lei ssertexr zza nia, armael nixmox ddei leil hhel du lei lol nia.

⁹ Arzzi-nimar arzzi-nimo mel, nia zzicarzzi leil bota nr ddo, nr nga a Arbosobo nia leil ser leilei. Yar ggucirmi ngier dae ho sael a nga. ¹⁰ Ngo ddei arzzi-nimar arzzi-nimo mel Seirpor ddei mi ddei leil koxl dae a ddar bbeix su xiezi mel cirza-hanga goxr sol car a, arsaе ssertexr zza, nia holcir dae nia. ¹¹ Yueboxr mi ca hal ddei goxr sol dae car a, arsaе ssertexr zza mel nia lei bbejjiur goxr a. Giedae Seirpor yar leil cirza-hanga meixl gger. Yel nia saexl, yarzi ssertexr zza ca hal mel mel Arbosobo yaa leil seir lol. Seirpor mel ca leil zoxlnixr, halae yaa leil perniar.

¹² Ngo ddei arzzi-nimar arzzi-nimo mel, zoxlyoxl zzir ddei mel hherdder: nia ddar bbeix a mel, nga mel dder “Nga” bbeix; nr nga mel dder “Nr nga” bbeix lalddo; merlabbor leil bbeixsaе middurbbor leil dor dae a bbeix nr ddo. Nr nga a Arbosobo nia leil ser leilei.

¹³ Nia ca mel gga goxr sol su zza a mel, yar dder Arbosobo dax ddar

biar nia; ggeese su zza a mel, yar dder caxlgo caxl a, Arbosobo leil bbeix zae gger nia; ¹⁴no su zza a nael, yar dder jiaxlhuixl gga ca leil guaxr su camar mel leil qie a, yaa leil Seirpor ddei mi ddei leil koxl dae a, yar ggecir leil ssuvi mei gger lol, halae Arbosobo dax ddar biar gger lol nia. ¹⁵Yaa ddar biar car a, nixmox zzar ddarzzi a mel, Seirpor no su ddei leil kor lol var, yar leil ha du lei lol var. Yar zuixl bei goxr arddeirnga a lei, Seirpor yar leil ssoxrsuxl var. ¹⁶Yel nia zzicarzzi dax armael ddei zuixl mel cexrssexl nia; zzicarzzi leil Arbosobo dax ddar biar gger nia. Eine nga a mel, nia no a lei kor var. Nixmox seir botaddu nr zza ca mel Arbosobo dax ddar biar a mel, arsae biar arsae nga var. ¹⁷Niul porpor Yirlixlyal lei niul sael a ca a cir ddei a; yar yarzi zabbar seilseir a Arbosobo leil almer tor nr lei lol qiuxr a, yarzi so koxl peix lei almer nr lei a. ¹⁸Giedae so koxl peix goxr ho a, yar yoxl Arbosobo dax ddar biar a, yel almer lei a, middur ddei leil dder cirza-hanga loxlmoxr ner teixl lei a. ¹⁹Ngo ddei arzzi-nimar arzzi-nimo mel, nia ca mel gga ha arseir Arbosobo dax bei nr mae, nael ca ar ddei a yar leil Arbosobo dax bei mae jjixr lei lol arddeirnga a, ²⁰ca eil ddei dder zuixl zza ca ddei xiu ddei leil jiuxl a; yar zuixl cirke bei goxr a lei, Arbosobo halae yar leil ssoxrsuxl var, nia saexl nia.